



册府元龟  
卷之二百六十六  
至六十九

13  
849  
89



門 4 3  
849  
89



冊府元龜

淮南李嗣京參閱

西極文翔鳳訂正

豫章黃國琦較釋

宗室部 五

儀貌 材藝

儀貌

洪範五事其二曰貌蓋所謂發乎容止著乎儀表者也矧乃託體霄極毓質肩禁粹靈攸蘊光華允集乃有奇姿雋彩孤標傑出聳羣庶之瞻仰增藩戚之焜

耀至或風度閒曠舉措詳緩威稜峻發眇眖雄毅斯  
固有儀可象望之儼然者已其於稟肖魁怪方牘所  
記者亦備載云

後漢東平王蒼光武子為人美鬚髯腰帶八圍明帝  
甚愛重之詔曰向者問東平王處家何等最樂王言  
為善最樂其言甚大副是腰腹矣

下邳王衍明帝子有容貌章帝卽位常在左右

蠡吾侯翼章帝子河間王之後元初六年徵詣京師

鄧太后奇翼美儀容以為平原懷王後

魏鄧哀王冲容貌姿美有殊於衆大祖時特見寵異

晉長沙王乂身長七尺

南陽王世子保體質豐偉嘗自稱重八百斤

清河康王遐字深度美容儀有精彩武帝愛之

宋廬陵王義真美儀貌神清秀徹

南郡王義宣白皙美鬚眉長七尺五寸腰帶十圍

南齊豫章王嶷身長七尺八寸善持容範文物衛從

禮冠百僚每出入殿省皆瞻望嚴肅

嶷弟宜都王鑑身長七尺狀似嶷咸以國器許之

隋郡王子隆年二十一而體過克壯常服蘆茹圓以

自消損

西陽王子明丰姿明淨士女觀者咸嗟嘆之

臨汝侯坦之肥黑無鬚語聲嘶時人號為蕭瘞

恪弟定襄縣侯祇美風儀幼有令譽

鄱陽王範世子嗣容貌豐偉腰帶十圍

宜豐侯修為衛尉卿美姿貌每屯兵周圍武帝視之

移輦臨川靜惠王宏身長八尺美鬚眉容止可觀

永陽嗣王伯游美風神善玄言

安陸王大春簡文子體貌環偉腰帶十圍

武威王大威簡文子美風儀眉目如畫

陳衡陽王昌高祖子容貌偉麗精神秀朗

鄱陽王伯山字靜之文帝子偉容儀舉止閑雅喜愠

不形於色文帝深器之

新安王伯固文帝子生而龜背目通睛皙白形狀眇

小而俊辯善言論

建安王叔卿字子弼宣帝子性質直有材器容貌甚

偉

宜都王叔明字子昭宣帝子儀容美麗舉止和弱狀

若婦人

後魏上黨王天穆性和厚美形貌其子儼亦美材貌

華山王鷲容貌魁狀腰帶十圍

東陽王丕淮南王他淮陽王元三人皆狀偉腰帶十圍大耳秀眉鬚鬢斑白百僚觀瞻莫不祇聳望都公頽昭帝之後大武以頽美儀容進止可觀使迎左昭儀於蠕蠕

秦明王幹子儀長七尺五寸容貌甚偉美鬚髯

陽平王他身長八尺美姿貌

南平王霄身長九尺腰帶十圍容貌魁偉雅有風則

貞白卓然甄成縣伯禹淮南王顯之子容貌魁偉

章武王彬子融字永興儀貌壯麗衣冠甚偉性通率

有豪氣

永昌王健明元子姿貌魁壯所在征戰常有大功

臨淮王彧美風韻善進止衣冠之下雅有容則

京兆王悰字魏慶善容貌風望儼然

城陽王鸞字宣明身長八尺腰帶十圍

北海王詳字季豫美容儀善舉止

陽平王新成子欽為尚書右僕射欽色尤黑故時人

號黑面僕射

濟南王彧姿制闊裕吐發流靡本名亮字仕明後啓

求改名詔曰仕明風神運吐聳自此荀文若何名字

以取定體相倫之美琅邪王誦有名人也見之未嘗

不心醉忘疲

彭城王勰字彥和獻文子美容貌善風儀端嚴若神折旋合度出入言笑觀者忘疲

齊郡王簡字叔亮文成子母沮渠牧犍女簡貌類外祖

咸陽王禧弟樹字秀和一字君立美姿貌位宗正卿後奔梁梁武尤器之封為魏郡王

清河王懌字宣仁文宗子幼而敏惠美姿貌孝文愛之彭城王勰甚器異之並曰此兒風神外偉實中內問若天假之年偕二南矣

北齊襄城王清神武子容貌甚美弱年有器望

南康王孝瑜文襄子容貌魁偉精彩雄毅

蘭陵王孝瓘文襄子貌柔心壯音容兼美

安德王延宗文襄子容貌充壯坐則仰偃則伏人笑之乃赫然奮發

趙郡王叡高祖弟之子身長七尺容儀甚偉

清河王徽字洪畧高祖從父弟長而敦直姿貌嶷然

沉深有器量

隋蜀王秀高祖子有膽氣容貌瓌瑋美鬚髯多武藝為朝臣所憚

觀德王雄高祖族子美姿儀有器度雍容閒雅進止可觀

齊王暉字世肅煬帝子美容儀踈眉目少為高祖所愛

趙王杲煬帝子聰令美容儀

燕王倓字仁安元德太子美姿儀煬帝於諸孫中特所鍾愛常置左右

建王侗字仁謹元德太子美姿儀性寬厚

唐江王元祥高祖子體質洪大腰帶十圍飲啖亦兼數人時韓王元嘉號王鳳魏王恭狀貌亦偉不逮於

元祥

滕王元嬰子涉壯貌類胡而豐碩

濮王泰太宗子帝以其腴腹洪大趨拜稍難令乘小輿至於朝所

申王撝睿宗子儀形瓌偉善於飲啖

夏悼王一玄宗子生而美秀帝鍾愛無化名之為一

永王璘玄宗子貌陋視物不正

晉高祖幼子重睿肖高祖故尤鍾愛

漢魏王承訓字德輝高祖之長子少溫原美姿儀高

祖尤鍾愛

材藝

周官保民以六藝教國子仲尼有言曰游於藝又曰吾何執執御乎執射乎蓋夫生民之秀自天攸縱靡不多能者矣矧乃鍾靈帝胄毓質宗翰憑席深厚英華發越至有博綜眾藝精覈數術旁通懸解舉臻其妙蓋出夫性習之自然志行之餘力也雖異乎詩書之雅言信義之成德亦猶賢於飽食終日無所用心者歟

周周公旦多材多藝

漢楚元王交多材藝

淮南王安為人好書鼓琴不喜弋獵狗馬馳騁

燕王旦狀大雄偉為人辨畧好星曆數術

廣川王去惠王越之子景帝孫也好方技博奕

定陶恭王康多材藝習知音樂

後漢北海王睦光武兄伯升孫也善史書當世以為

楷則及寢疾明帝驛馬令作草書尺牘十首牘書版也蓋長

一尺因以名焉陳王寵善弩射十發十中中皆同處寵射其秘法以天覆地載參達

為寄又有三微三小三微為經三小為中平中黃巾

緯經緯相將萬姓之方然在有機牙賊起國人素聞王善射不敢反叛



樂成靖王黨聰惠善史書喜正文字

魏陳侯仁太祖從弟也少好弓馬

邵陵侯貞太祖族子嘗獵為虎所逐顧射虎應聲而  
倒

任成王彰太祖子少善射御膂力過人手格猛獸好  
擊劍

陳思王植太祖子太祖遣邯鄲淳詣植植初得淳甚  
喜延入坐不先與談時天暑熱植因呼嘗從取水自  
澡訖傳粉遂科頭扣祖胡舞五椎鍛銚丸擊劍誦俳  
優小說數千言訖謂淳曰邯鄲生何如邪於是乃更

着衣幘整儀容與淳評說混元造化之端品物區別

之意然後論羲皇以來賢聖名臣烈士優劣之差次  
頌古今文章賦咏及當官政事宜所先後又論用武  
行兵倚伏之勢乃命厨宰酒炙交至坐席默然無與  
侘者及暮淳歸對其所知嘆植之材謂之天人

吳建侯慮字子智太子發弟也少敏惠有材藝大帝  
器愛之

晉通吉亭侯勳宣帝弟恂曾孫便弓馬能左右射以  
勇聞

齊王攸文帝子善尺牘為世所楷

宋江夏王義恭善騎射解音律

長沙王道憐子義融歷五兵尚書領軍有質幹善於用短楯

南齊臨川王映高帝子善騎射解聲律工左右書左右射

映子州陵侯游亦好音樂解絲竹雜藝

長沙王晃高帝子便弓馬武帝嘗幸鍾山晃從駕以馬稍刺道邊柘葉帝令左右數人引之銀纏皆卷聚而稍不出乃令晃復馳馬拔之應手便出每遠州獻駿馬帝輒令晃於林中調試之

武陵王曄高帝子初高帝在淮陰雖爲方伯而居處貧諸子學書無紙筆曄常以指畫空中及畫掌學字遂工篆法少時又無棊局又破荻爲片縱橫以爲棊局指點行勢遂至名品射爲當時獨絕

琅邪王瞻亦稱善射而不及曄也武帝幸豫章王嶷東田宴諸王獨不召曄嶷曰風景殊美今日甚憶武陵帝乃呼之曄善射屢發屢中顧謂四座曰手何如帝神色甚怪嶷曰阿五嘗日不爾今可謂仰藉天威帝意乃釋後於華林射賭帝勅曄疊破丸於六箭五破一皮賜錢五萬

江夏王鋒高帝子年四歲宋蒼梧王欲害鋒高帝匿於張氏舍鋒好學書張家無紙札乃倚井欄為書書滿則洗之已復更書如此者累月又晨興不肯拂牕塵而先畫塵上學為書字五歲高帝使學鳳尾詔一學即工高帝大悅以玉麒麟賜之日麒麟賞鳳尾矣好琴書蓋亦天性嘗覲武帝賜以寶裝琴乃於御前鼓之大見賞帝謂鄱陽王鏘曰闍黎琴亦是柳令之流亞

時柳一隆為尚書令善彈琴風韻清遠 其人事事有意吾欲試以臨人鏘曰昔鄒忌鼓琴威王委以國政乃出為南徐州刺史工書為當時藩王所推南羣王昭業亦稱工

謂武帝曰臣書固應勝江夏王武帝答曰闍黎第一法身昭業小名闍黎鋒小名也

宜都王鏗高帝子善射常以棚大濶田終日射侯何難之有乃取苮蔗挿地百步射之十發十中

魚復侯子響武帝子勇力絕人弓四斛力數在園池中帖馬馳走竹樹下身無虧傷

竟陵王子良孫賁能書善畫於扇上圖山水咫尺之內便覺萬里為遙

曲江公暹欣子幾善草隸書

新浦縣侯子雲善草隸書為時楷法自云善效鍾元

嘗王逸少而微變體子特亦善草隸

祁陽縣侯子範子乾善隸書得叔父子雲之法

梁廬陵王績武帝子少英果膂力絕人馳射應發命中武帝嘆曰此我之佳城也常馳射於帝前績中爾聲冠於諸人帝大悅

邵陵王綸武子尤工尺牘

汝南侯堅綸之長子亦善草隸

永安侯確綸次子少驍勇尤工楷隸公家碑碣皆侯書之又習騎射與兵法

武陵王紀武帝子便騎射尤工舞稍頗學觀占善風

角

南安侯駿長沙王懿孫也善草隸晚更習武膂力絕

人

河東王譽昭明大子子幼有驍勇馬上用弩

南郡王大連簡文子少俊爽能屬文舉止風流雅有巧思妙達音樂兼善丹青高帝幸朱方大連與兄大臨並從高祖問曰汝等習騎不對曰臣等未奉詔不敢輒習勅各給馬試大連兄弟據鞍往還各得馳驟之節高祖大悅卽賜所乘馬及爲啓謝詞又甚美忠烈世子方等元帝子少聰敏有俊才善騎射尤長

巧思

陳遂興侯詳善書記談論清雅

始興王伯茂文帝子世祖深愛之是時征北軍人於丹徒盜發晉郗曇墓大獲晉右將軍王羲之書及諸名賢遺跡事覺其書並沒縣官藏於秘府世祖以伯茂好古多以賜之繇是大工草隸甚得右軍之法長沙王叔堅宣帝子少傑黠尤好數術卜筮風角鎔金琢玉並究其妙

後魏淮陵侯大頭烈帝之後也善騎射

暨陽子可悉陵年十七從大武獵遇一猛獸遂空手

搏之以獻帝曰汝才力絕人當爲國立功立事勿如此也又從平涼州沮渠茂處令一騎將與陵相擊兩槩皆折陵抽箭射之墜馬陵恐其救至未及拔劍以刀子戾其頸使身首異處帝壯之

高涼王孤平多才藝有志畧

彭城公勃善射御

衛王儀有筭畧少能舞劍騎射膂力絕人弓將十石陳留王虔稍大稱異時人云衛王弓桓王稍

新蔡公幹儀子也善弓馬以騎從明元於白登之東北有雙鴟飛鳴於上帝命左右射之莫能中鴟旋飛

稍高幹以二箭下雙鷗帝賜之御馬弓矢金帶一以旌其能軍中於是號幹爲射鷗都將

上黨王天穆射有名

陳留王虔武力絕人每以矛細短大作之猶患其輕復綴鈴於双下其弓力倍加嘗人嘗以稍刺人遂貫而高舉又嘗以一手頓稍於地馳馬僞退敵人爭取引不能出虔引弓射之一箭殺二三人搥稍之徒亡魂而散徐乃令人取稍而去

河南王暉道武子嘗射雀於帝前中之帝驚嘆焉及長武藝絕人

永昌王德明元子才藝比陳留桓王而智畧過之從大武襲蠕蠕越隊邪山詔健殿後矢不虛發中皆應弦而斃威震漢北

彭城王栗弟渾少善弓馬大武嘉之會有諸方使命渾射獸三頭發皆中時舉坐咸以爲善

陽豐侯庫汗渾子也爲羽林中郎將從北巡有兔起乘輿前命庫汗射之應弦而斃大武悅賜一金兔以旌其能

南平王渾道武孫好弓馬射鳥輒歷飛而殺之日射兔得五十頭時皆嘆異焉大武嘗命左右分射勝者

中的籌滿詔渾解之三發皆中大武大悅器其藝能  
嘗引侍左右賜馬百匹僮數十人

新興王俊明元子少善騎射多藝

南安王英性識聰敏博聞強記便弓馬解吹笛微曉  
醫術

北海王詳獻文子嘗從車駕至文城射銘之所孝文  
停駕詔諸弟及侍臣皆試射遠近唯詳箭不及文成  
箭所十餘步孝文嘉之拊掌欣笑遂詔勒銘親自爲  
制

晉陽縣伯贊弟淑彎弓三百斤善騎射

東阿公順任城王澄子篤志愛古解鼓琴

彭城王邵獻文孫也少有氣節善武藝

濮陽王順善射孝武在繇於華林園戲射以銀酒卮  
容二升許懸於百步外命善射者十餘人共射中者  
卽以賜之順發矢卽中帝大悅並賞金帛順仍於箭  
孔處鑄一銀童足蹈金蓮手持刻炙遂勒背上序其  
射工

北齊趙郡王琛神武弟少便弓馬有志氣

永南王俊神武子豪爽有氣力善騎射爲文襄所愛  
上黨王渙神武子力能扛鼎材武絕倫每謂左右曰

人不可無學但不為博士耳故讀書頗知梗槩而不甚耽習

河南王孝瑜字正德文襄長子覆棊不失一道

廣寧王孝珩文襄子愛賞人物有技藝嘗於廳事壁自畫一蒼鷹見者皆以為真又作朝士圖亦當時之妙絕

後周東平公神舉文帝族子父顯和膂力絕人彎弓數百斤能左右馳射從孝武入關至溱水帝素聞其善射而未之見俄而水傍有一小鳥顯和射中之帝笑曰我知卿工矣神舉尤工騎射

汝南王慶神舉弟沉深有器局善射有膽氣好格猛獸從武帝伐齊與賊爭進慶射之所中人必倒賊乃稍却

代王達文帝子性果決善騎射

齊殤王憲之子貴字乾福少聰敏尤便騎射年十一

從憲獵於鹽州一圍之中手射野鳥及鹿一十五

隋義城公處剛高祖族父也生長北邊少習騎射

滕穆王瓚子倫字斌籀性弘厚頗解鐘律

齊王暕字世拙煬帝子頗涉經史尤工騎射

唐漢王元昌高帝子性警悟有勇力工騎射頗涉文



册府元龜 材藝 史兼能隸書

霍王元軌高祖子少善騎射初爲吳王時嘗從太祖遊獵遇群獸命射之矢不虛發獸無遺者太宗撫其背曰汝才藝過人恨今無所施耳當天未定我得汝豈不要乎

徐王元禮高祖子少恭謹善騎射

琅邪王冲越王貞長子好文學善騎射歷陳壽博州刺史皆有能名

江都王緒霍王元軌長子少好學有雋才書畫騎射能爲一時之絕

吳王恪太宗第三子少騎射太宗甚愛之

濮王泰太宗第五子少好學善屬文工草隸待賢禮士深爲太宗所愛

紀王慎太宗第十子慎好學解天文明練吏事皇族中與越王貞齊名時人號爲紀越

光王琚玄宗子有才力善騎射

求王璘玄宗第十六子少聰敏善草隸

齊王倓肅宗子英毅有才畧善騎射

梁朱友倫太祖仲兄存次子幼歲從師讀書稍長學歐陽詢筆蹟甚得其體勢弱冠有壯志嘗侍立帝側

陳自試之請帝笑曰昔之東阿今復爾耳

册府元龜

淮南李嗣京參閱

西極文翔鳳訂正

豫章黃國琦較釋

宗室部 六

孝行

有若有言曰孝弟也者其為仁之本歟矧乃公族之賢宗室之懿躬履至行出於天性或承顏侍膳就養無方或攀慕時思永懷罔極因心表於童非寧戚逮於毀傷斯皆國風忠厚之美人倫模範之盛傳所謂

常守富貴能保社稷者諸侯之孝也又何止不驕不  
溢云乎哉固將錫類以貽休與仁而成化矣

周公旦武王之弟

以太王所居周地為其菜邑故謂周公

自文王時旦

為孝篤仁異於羣子

漢梁孝王文帝之子為人慈孝每聞太后病口不能  
食嘗留長安侍太后太后亦愛之

楚孝王囂成帝河平中入朝被疾天子聞之下詔曰  
蓋聞天地之性人為貴人之行莫大於孝楚王囂素  
行孝順朕甚嘉之

河間惠王良循其祖獻王之行母太后薨服喪如禮

哀帝下詔褒揚曰河間王良喪太后三年為宗室儀  
表其益封萬戶

後漢淄川王終泗水王欽之子欽薨終居喪思慕哭  
泣二十餘日亦薨

東海孝王臻頃王肅之子臻及弟蒸卿侯儉並有篤  
行母卒皆吐血毀脊

背或脊

至服練紅兄弟追念頃王

初喪幼小哀禮有闕因復重行喪制

既祥之後而服練也練衣練練

練即紅也

琅邪孝王京光武之子性恭孝

東平孝王敞喪母至孝國相陳珍上其行狀任城王

博有孝行喪母服制如禮

清河王慶明帝之子母宋貴人爲竇后所譖自殺慶

嘗以貴人葬禮有闕每竊感恨至四節伏臘輒祭於

私室竇氏誅後

謂竇憲伏誅後

始使乳母於城北遙祠及竇

太后葬慶求上冢致哀和帝許之詔大官四時給祭

具慶垂泣曰生雖不獲俱養終得奉祭祀私願足矣

欲求作祠堂恐有自同恭懷梁后之嫌遂不敢言嘗

泣向左右以爲沒齒之恨後上言外祖母王年老遭

憂病下土無醫藥願乞請維陽療疾於是詔宋氏悉

歸京師和帝厭世慶號泣前殿嘔血數升因以發病

及病篤謂宋衍等曰清河埤薄欲乞骸骨於貴人家

傍下棺而已朝廷大恩猶當應有祠堂庶母子并食

魂靈有所依庇死復何恨乃上書於太后曰臣國土

下濕願乞骸骨下從貴人於樊濯雖沒且不朽矣及

今日目尚能言視冒昧于請命在呼吸願蒙哀憐遂

薨

濟北孝王次釐王安國之子九歲喪父至孝桓帝建

和元年梁太后下詔曰濟北王次以幼年守藩躬履

孝道父沒哀慟焦毀過禮草廬土席衰杖在身頭不

堪沐體生瘡腫諒闇已來二十八月自諸國有憂未

之聞也朝廷甚嘉焉書不云乎用德彰厥善詩云孝子不匱永錫爾類今增次封五千戶廣其土宇以慰孝子惻隱之勞

彭城孝王和頊王定之子性至孝太夫人薨行喪陵次毀脊過禮傅相以聞桓帝詔使奉牛酒迎王還宮魏長平侯休太祖族子文帝時爲征東將軍領楊州刺史休喪母至孝帝使侍中奪喪服使飲酒食肉休受詔而形體益憔悴乞歸譙葬母帝復遣越騎較尉薛喬基奉詔節其憂哀使歸家治喪一宿便葬葬訖詣行在所帝見親自寬慰之其見愛重如此

陳王志思王植之子遭母憂居喪盡哀因得疾病甚怒失嘗

晉扶風武王駿宣帝子有孝行母伏太妃適兄亮在官駿嘗涕泣思慕若聞有疾輒憂懼不食或時委官定省

新野王歆駿之子謹身履道母臧太妃薨居喪過禮以孝聞

齊獻王攸文帝之子景帝無子攸爲嗣景帝山陵攸年十四歲哀動左右大見稱嘆襲封武陽侯奉景獻羊后于別第事母以孝聞及居文帝喪哀毀過禮杖

而後起左右以稻米乾飯雜理中圓進之攸泣而不  
受太后自往勉喻曰若萬一加以他疾將復如何宜  
遠慮深計不可專守一志嘗遣人逼進飲食後太后  
有疾既瘳武帝與攸奉觴上壽攸以太后前疾危篤  
因歔歔流涕帝有愧焉攸侍帝病有憂蹙之容時人  
以此稱嘆之攸至性過人有觸其諱者輒泫然流涕  
雖武帝亦憚之每引之同處必擇言而後發  
攸子武閔王罔初攸有疾武帝不信遣太醫診候皆  
言無疾及攸薨帝往臨喪罔號踊訴父病爲醫所誣  
詔卽誅醫繇是見稱遂得爲嗣

成都王穎武帝子與齊王罔誅趙王倫迎太子反王  
穎遂歸鄴遣信與罔別罔大驚馳出送穎至七里澗  
及之穎住車言別流涕不及時事惟以太妃疾苦形  
於顏色百姓觀者莫不傾心

高陽元王珪安平獻王孚之子爲北中郎將督鄴城  
守諸軍事泰始中八朝以父孚年高乞留供養拜尚  
書遷僕射

長沙厲王又武帝子年十五居武帝喪孺慕過禮會  
楚王瑋奔喪諸王皆近路迎之又獨至陵所號慟以  
侯瑋

武陵忠敬王遵威王晞之子初襲封新寧時年十二受拜流涕哀感左右

東安王繇事親孝居喪盡禮

宋建平王景素宣簡王宏之子性甚仁厚事母太妃朝夕不違侍養太妃有不安景素傍行蓬髮與人言煦煦嘗傷其情

南齊豫章文獻王嶷高帝第二子居帝喪哀號過度眼耳俱出血

祁陽縣侯子範疑子也有孝性丁所生母憂居喪以毀聞

武陵昭王曄高帝第五子母羅氏從帝淮陰以罪誅曄年四歲思慕不異成人每慟吐血高帝勅武帝曰三昧至性如此恐不濟汝可與共住每抑割之三昧曄小子也

始興王鑑高帝第十子年八歲喪所生母號慕過人數日中便至骨立豫章文獻王聞之撫其身嗚咽謂高帝曰此兒操行異人恐其不濟帝亦悲不自勝衡陽王鈞高帝第十一子年五歲所生區貴人病更加慘悴左右依嘗以五色餅餽之不肯食日頽待缺差年七歲出繼衡陽元王年高帝未拜便涕泗橫流

高帝執其手曰伯叔父猶父勿怨所以令汝出繼以汝有意堪奉蒸嘗故耳即勅外如先給通幃車雉尾扇等事事依正王區貴人卒居喪盡禮服闋疋羸骨立登車三上不能升乃止典籤曹道人具以聞武帝即幸釣邨見之愴然還謂褚綦曰昨見衡陽猶奇毀損卿可數相撫悅先是貴人以花釵厨子并剪刻錦繡中倒炬鳳凰蓮芰星月之屬賜釣以為玩弄貴人亡後每歲時及朔望輒開視再拜哽咽見者皆悲宜都王鑑高帝第十六子生三歲喪母及有識問母所在左右告以早亡便思慕蔬食自悲不識母嘗祈

請幽冥求一夢見至六歲遂夢死見一女人云是其母鑑泣向舊左右說容貌衣服事皆如平生聞者莫不歎欷

河東王鉉高帝第十九子年三四歲帝晝卧纏鬚鉉上高帝腹上弄繩高帝因以繩賜鉉及喪帝後鉉以寶函盛繩歲時輒開視嗚咽流涕人才至凡而有此一至孝

竟陵王子良武帝第二子帝為贛縣時與裴后不諧遣人般送后還都邑已登路子良時年少在庭前不悅帝謂曰汝何不讀書子良曰孃今何處何用讀書



帝異之卽詔后還縣

晉安王子懋武帝第七子年七歲時母阮淑媛嘗病危篤請僧行道有獻蓮花供佛者衆僧以銅甕盛水漬其莖欲花不萎子懋流涕禮佛曰若使阿姨因此和勝願諸佛令花竟齋不萎七日齋畢花更鮮紅視甕中稍有根鬚當時稱其孝感

南海王子罕武帝第十一子母樂容華嘗寢疾子罕晝夜禱祈於時以竹爲燈續晷夜此續宿昔枝葉大茂母病亦愈咸以爲孝感所致主簿劉驥及侍讀賀子喬爲之賦頌當時以爲美談

南豐侯穎胄高帝從祖弟赤斧之子遭父喪感脚疾數年然後能行武帝有詔慰勉賜醫藥

新吳侯景先高祖從子少遭父敬宗喪有至性帝嘉之

梁安成康王秀高祖弟年十二所生母吳太妃亡秀母弟始興王憺時年九歲並以孝聞居喪累日不進飲太祖親取粥授之哀其早孤命側室陳氏並母子陳亦無子有母德視二子如親生焉

臨川靜惠王宏高祖弟也宏所生母陳太妃寢疾宏與母弟南平元襄王偉侍疾衣不解帶每二宮參問

輒對使泣涕及太妃薨水漿不入口者五日高祖每臨幸慰勉之偉雖奉詔而毀瘠殆不勝喪先是齊宋宏避難潛伏與太妃異處每遣參太妃消息或謂宏曰逃難雖密不宜往來宏銜淚答曰乃可無我不可於此事斃廢

鄱陽忠烈王恢高祖弟也有孝性初鎮蜀所生費太妃猶停都下後於都不豫恢未之知一夜忽夢還侍疾既覺憂惶便廢寢食俄而都信至太妃已瘳後又有目疾久廢瞻視有北度道人慧龍得治眼術恢請之既至空中忽見聖僧及慧龍下鍼豁然開朗咸謂

精誠所致

恢孫宜豐侯修性至孝年十二丁所生徐氏喪自荆州反葬中江風前後部伍多致沉溺修抱柩長號血淚俱下隨波搖蕩終得無他葬訖因廬墓次先時山中多猛獸至是絕跡野鳥馴狎棲宿簷宇武帝嘉之以頌告宗室

始興忠武王憺高祖弟始數歲所生母吳太妃卒憺哀感傍人後為荊州刺史慈母陳太妃薨水漿不入口六日居喪過禮高祖優詔勉之使攝州任憺子新喻侯暉為淮南太守丁父憂隆冬席地哭不

絕聲不嘗穀粒惟飲冷水因患癥結除太子洗馬  
映弟上黃侯擘自憺不豫侍疾衣不釋帶言與淚并  
憺薨杖而後起服闋後居太后憂泣血三年

桂陽嗣王象高祖兄子容止閒雅事所生母以孝聞  
南康簡王績高祖子為江州刺史丁董淑儀憂居喪  
過禮高祖手詔勉之使攝州任固求解職乃徵授安  
右將軍領石頭戍軍事尋加護軍羸瘠弗堪視事

績子通理生十旬而績薨至三歲能言見內人分散  
涕泣相送通理問其故或曰此簡王宮人喪畢去耳  
通理便號泣悲不自勝諸宮人喪畢見之莫不傷感

為之停者三人焉服闋後見高祖又悲泣不自勝高  
祖為之流涕謂左右曰此兒大必為奇士

南海王大臨簡文帝子年十一遭左夫人憂哭泣毀  
瘠以孝聞

義安王大昕簡文帝子始四歲母陳夫人卒便哀慕  
毀額有若成人及簡文居高帝喪大昕奉慰嗚咽不  
能自勝左右見之莫不掩泣

西昌侯藻高祖兄長沙王懿之子懿仕齊為東昏侯  
所害藻嘗布衣蒲席不食鮮禽非在公庭不聽音樂  
高祖每以此稱之

吳平侯景高祖從父弟父崇之為東陽太守遇害景八歲隨父在郡居喪以毀聞

景子勵為太子洗馬以母憂去職殆不勝喪每一思至必徒步之墓或遇風雨仆卧中路坐地號慟起而復前家人不能禁景特所鍾愛曰吾百年後其無此子乎使左右節哭服闋除太子中舍人景薨於郢鎮或以賂遠秘其凶問以疾漸為辭勵乃奔波屈於江夏不進水漿七日廬於墓所親友隔絕會叔父曇下詔獄勵乃率昆弟群從同詣大理雖門生故吏莫能識之後襲封吳平侯封陽人主悲慟嗚咽傍人亦為

隕涕

陳鄱陽王伯山文帝子也丁所生母憂居喪以孝聞後主嘗幸吏部尚書蔡徵宅因往弟之伯山號慟殆絕因起為鎮衛將軍仍謂群臣曰鄱陽王至性可嘉又是西弟之長豫章已兼司空其亦須遷太尉未及發詔而伯山薨

後魏任城康王雲太武帝弟始五歲恭宗薨

大武長子也文

成追尊為景穆皇帝廟號恭宗號哭不絕聲太武聞之而呼抱之泣

曰汝何知而有成人之意後為征東大將軍開府徐州刺史以太妃蓋氏薨表求解任獻文不許雲悲號

州府元... 孝行  
慟疾乃許之

雲子文宣王澄字道鏡少而好學父康王薨澄居喪以孝聞後爲征北大將軍定州刺史孟太妃薨居喪毀瘠當世稱之

澄子東河文烈公順爲太嘗少卿以父憂去職哭泣嘔血身自負土時年二十五便有白髮免喪服去不復更生世人以爲孝思所致澄初爲吏部尚書兼右僕射順後亦爲之順上省登階向榻見榻甚故問都令史徐作起作起曰此曾經先王坐順卽哽塞涕泗交流久而不能言遂令換之

南安王楨景穆之子也性忠謹事母以孝聞高祖賜帛千匹以褒之

彭城王勰字彥和獻文帝之子生而母潘氏卒其年獻文喪及有所知啓求追服文明太后不許乃毀瘠三年弗參吉慶孝文大奇之

臨淮王提爲梁州刺史以貪縱削除加罰徒配北鎮久之提子員外郎穎免冠請解所居官代父邊戍孝文不許

提子濟南王昌好文學居父母喪哀號孺慕悲感行人

昌子或詔封濟南王爲東道行臺會爾朱榮入雒殺  
害元氏遂奔於梁及知莊帝踐祚或以母老請還辭  
旨懇切梁武帝惜其人才又難違其意遣其僕射徐  
勉私勸或留或曰死猶願北况於生也乃以禮遣或  
性至孝自經違離不進酒肉憔悴容貌見者傷之  
艾陵伯萇子子華母房氏曾就親人飲食夜還大吐  
人以為中毒母甚憂懼子華遂掬吐盡噉之其母乃  
安

饒陽男遙京兆王子推之子爲左衛將軍宣武初遭  
所生母憂表請解任詔以爲尊所厭不許

馮翊王亨年十二恭帝在儲宮引爲交友大統末襲

父季爵邑千戶授拜之日悲痛不能自勝

北齊清河王岳神武從父弟仕魏爲京畿大都督元  
象元年遭母憂去職岳性至孝盡力包養母若疾衣  
不解帶及遭喪哀毀骨立神武深以憂之每日遣人  
勞勉

巨坡郡公戲高祖弟趙郡王琛之子生三旬而孤爲  
高祖所愛養於宮中令游娘母之至四歲未嘗識母  
其母則魏華陽公主也有鄭氏者戲母之從母姊妹  
之女戲語戲曰汝是我姨兒何因到親游氏戲因問

訪遂精神不怡高祖甚以為怪疑其感疾欲命醫看  
 之獻對曰兒無患若但聞有所生欲得覩見高祖驚  
 曰誰向汝道耶獻具陳本末高祖命元夫人令就宮  
 與獻相見獻前跪拜因抱頸大哭高祖甚以悲傷語  
 於秦王歸彥曰此兒天生至孝我兒子無有及者遂  
 為休務一日獻初讀孝經至資於事父輒流涕歔歔  
 十歲喪母高祖親送獻至領軍府為獻發喪舉聲殞  
 絕哀感左右三日水漿不入口高祖與武明婁聖后  
 殷勤敦譬方漸順旨居喪盡禮持佛像長齋至於骨  
 杖而后起高祖令嘗山王共卧起日夜說喻之并

勅左右不聽進水雖絕清漱午后輒不肯食孫是高  
 祖食必喚獻同案其見愍惜如此居高祖喪哭泣嘔  
 血及壯將為婚娶而貌有蹙容世宗謂之我為爾娶  
 鄭述祖女門閤甚高汝何所嫌而精神不樂獻對曰  
 自痛孤遺當深懸下之慕方從昏冠彌用感切言未  
 卒嗚咽不自勝世宗為之憫然天統中追贈獻父琛  
 假黃鉞母元氏趙郡王妃謚曰貞昭華陽長公主如  
 故有司備禮儀就墓拜授時隆冬盛寒獻跣步號哭  
 面皆破裂嘔血數升及還不堪參謝帝親就第看問  
 博陵王濟神武第十二子嘗從文宣巡幸在路忽憶

太后遂逃歸帝怒臨以白刃因自驚悅

平秦王歸彥高祖族弟嫡母康氏所生母王氏並為

大妃善事二母以孝聞

是時南陽王緯兄弟皆呼父為兄兄嫡母為家乳母為娣

婦為姊妹

後周惠邵公顥文帝之長兄性至孝居德皇后喪哀

毀過禮德皇帝與衛可瓌戰墜馬顥與數騎奔救乃

免顥遂戰没保定初追封馬顥曾孫幽公廣母李氏

以廣患彌年憂而成病因此致卒廣居喪更加綿篤

及以毀薨世稱母為廣患廣為母死慈孝之首極於

一門高祖素服親臨百僚畢集故吏儀同李克信等

上表論其忠孝其宿志期以窳窳之禮庶存儉約伏

願聽許詔從之葬贈本官加太保葬於隴右

齊王憲所生達步干氏茹人建德三年冊為齊國太

妃憲有至性事親以孝聞太妃舊患風熱屢經發動

憲衣不解帶扶持左右憲或東西從役每心驚其母

必有疾乃馳使參問果如所屬

隋趙王杲煬帝幼子性至孝嘗見帝風動不進膳杲

亦終日不食又蕭后炙杲先請試炷后不許之杲泣

請曰后所服藥皆蒙嘗之今炙願聽嘗炷悲咽不已

后竟為其停炙繇是尤愛之



燕王倓元德太子次子母曰大劉良姊煬帝於諸孫中特所鍾愛良姊早終倓每至忌日未嘗不流涕嗚咽帝繇是益以奇之

唐韓王元嘉年十五在潞州聞大妃病便流泣不食至京發喪哀毀過禮太宗嗟其至性屢慰勉之

道王元慶事母以孝聞高宗顯慶中太妃薨上表請身修墳塋詔不許之

薛王業母終從母賢妃親鞠養之至是迎賢妃出外宅事之甚謹同母妹淮陽諒國二公主公早卒業撫愛其子逾於己子睿宗以業孝友特加親愛

信安都王偉少有志尚事繼母甚謹撫繼母所生弟祗等以友愛稱玄宗開元中丁母憂去官起復授瀛州刺史又上表固終喪制許之

高平王道立孫涵有名宗室代宗寶應元年初平河朔拜涵左庶子兼中丞河北宣慰使丁母憂起復本官而往每至州縣郵驛公事之外都不發言蔬食飲水席地而息使還固請罷官終喪制代宗以其毀瘠許之

嗣曹王臯奉太妃鄭氏以孝聞後爲衡州刺史時坐小法御史覆訊懼貽太妃憂出則素服入則公服言

貌如平嘗太妃不之知也及爲潮州刺史詭詞謂遷官屬楊炎貶官在道知臯事直後炎作相復以爲衡州刺史方且以事白太妃因泣下具言非疾不敢有聞其沉密重慎如此比貞元初爲江陵尹乃請歸東都祔喪德宗使中使弔之贈臯父右僕射母鄭氏曹國太妃既葬朝於京師詔還鎮出東都將以拜墓觀者榮之

卷終

冊府元龜

淮南李嗣京參閱

西極文翔鳳訂正

豫章黃國琦較釋

宗室部

七

來朝

輔政

就國

來朝

昏定晨省爲子之道也春朝秋覲事君之義也蓋所以正班爵而有叙訓上下而爲典者焉自漢氏之世戚藩列樹連城布土分王同姓慎棟僚案爲之傳相

雖違顏於咫尺而存心於象魏故得歲自入謁時或  
召對恭上之體無越於嘗度展親之憂宛如於家人  
亦有徵詣行在駿奔祀事忠勤形於貢奉孝弟著於  
誠明為國邸之表儀推問望於英哲宜乎優賜名數  
加進秩封遂其請求曾無所吝者矣魏晉而下奉主  
覲見者咸以記云

漢高祖九年十月楚王交朝未央宮

八年九月自  
維陽至長安

十年十月荆王賈楚王交齊王肥來朝

惠帝元年淮南王長入朝

長立三  
年也

二年十月齊悼惠王肥來朝獻城陽郡以益魯元公

王邑

文帝二年三月立皇子武為代王參為太原王揖為

梁王武後徙為淮陽王又徙梁王十四年

朝十七年十八年比年入朝留比類也留謂  
留在京師共明年

乃之國二十一年入覲參五年一朝凡三朝揖五年

一朝凡再入朝

景帝二年梁王武入朝

武帝二十  
四年也

三年梁王武復入朝

武帝二十  
五年也

四年衡陽王勃來朝初吳楚王反王堅守無二心是  
年吳楚已破王朝帝以為真信乃勞苦之

勞音來  
到反曰

南方卑濕徙王於濟北以褒之

七年十月梁王武入朝武帝二十九年帝使使持乘輿駟馬

迎梁王於闕下天子副車駕駟馬輿即車也既朝上疏因留中六

年冬梁王武復入朝武帝三十五年也上疏欲留帝弗許

後二年諸王來朝有詔更前稱壽歌舞長沙定王發

但張袖小舉手左右笑其拙帝怪問之對曰臣國小

地狹不足回旋帝以武陵零陵桂陽屬焉

武帝元光六年衡陽王賜入朝是時淮南王安河間

三德入朝安德史失其年

昭帝元鳳中廣陵厲土胥入朝益封萬戶

成帝河平中楚孝王囂入朝正月時被疾帝聞之詔

與子男一人俱從王入朝也是時東平思王宇來朝上疏

求諸子及太史公書帝以問大將軍王鳳對曰臣聞

諸侯朝聘考文章正法度非禮不言今東平王幸得

來朝不思制節度以謹防危失危失謂失道而傾危也而求諸

書非朝聘之義也諸子書或反經術非聖人或明鬼

神信怪物物亦鬼大史公書有戰國縱橫權譎之謀漢

興之初謀臣奇策天官災異地形阨塞皆不宜在諸

侯王不可予不許之辭宜曰五經聖人所制萬事靡

不畢載王審樂道傳相皆儒者朝夕講誦足以正心

虞虞與意嫖同夫小辯破義大道不通致遠恐泥皆不足

以留意泥音乃細反諸益於經術者不愛於王愛惜也於

王無所惜對奏天子如鳳言遂不與

後漢光武中元元年正月東海王疆沛王輔楚王英

濟南王康淮南王巡趙王盱皆來盱音詡又二月從

封岱山疆因留京師二年冬歸國

明帝永平二年九月沛王輔楚王英濟南王康淮陽

王延東海王政來朝

六年正月沛王輔楚王英東平王蒼淮陽王延琅邪

王京東海王政趙王盱北海王興齊王石來朝

十一年正月沛王輔楚王英濟南王康東平王蒼淮

陽王延中山王焉琅邪王京東海王政來朝

十五年二月帝幸彭城耕於下邳三月徵琅邪王京

會良成縣名故城在今下邳縣北徵東平王蒼會陽都縣名在今沂水縣南

又徵廣陵侯及其三弟會魯祠東海恭王陵

章帝建初七年正月沛王輔濟南王康東平王蒼中

山王焉東海王政琅邪王宇來朝

元和二年九月徵濟南王康中山王焉會祭蒸嘗

三年正月北巡狩濟南王康中山王焉西平王羨六

安王恭樂成王黨淮陽王昞任城王尚沛王定皆從

來朝

臣欽若等按元和二年九月徵濟南王

康中山王鄂其餘史不書來朝年月

章和二年正月濟南王康阜陵王延中山王焉來朝

安帝延光三年二月幸大山齊王無忌東海王普樂

安王延來朝

魏文帝黃初四年任城王張雍丘王植朝京師

明帝太和五年冬詔諸王朝京師

青龍三年徵燕王宇入朝

景初二年徵燕王宇詣京師

晉武帝泰始四年太原王瓌入朝賜袞冕之服

六年高陽王珪入朝以父卒年高乞留供養拜尚書

遷右僕射

咸寧中河間王顥與諸王俱來朝帝歎顥可以為諸

國表儀

惠帝永光二年二月鎮南將軍楚王瑋領東將軍淮

南王允來朝是時秦王東來朝史不書月

元康九年淮南王允入朝拜驃騎將軍

宋高祖永初二年長沙王道憐自京口朝正入仔殿

省

後魏獻文帝和平六年十月徵陽平王新城京兆王十

推濟陰王小新城汝陰王天賜任城王雲入朝

來朝

後周靜帝卽位趙王括陳王純越王達代王盛滕王道來朝

唐太宗貞觀十一年十一月丁亥潞州刺史韓王元嘉絳州刺史霍王元軌豫州刺史道王元慶並來朝十二年齊州都督齊王祐入朝因稱疾願留京師十六年十一月癸丑朔梁州都督漢王元昌徐州都督徐王元禮絳州刺史霍王元軌壽州刺史舒王元名揚州都督越王元貞來朝

二十年十月徐州刺史霍王元軌許州刺史樊王暉來朝

二十一年十月滑州刺史舒王元名相州刺史趙王貞來朝貢

二十二年十月絳州刺史徐王元禮襄州刺史紀王慎來朝

梁太祖開平四年十月乙亥東京留守博士友文入覲召之也  
後唐愍帝應順元年閏正月癸亥洋王從璋自河中入覲獻甲馬二十疋

輔政

夫右賢左戚古之道也自商周之並建子弟以屏王

室或入為卿士宰司國政故雖五屬之親而無官蓋尚德也是知熙帝載執國成惟賢明而是託當親羈而並進繇漢而下迄於後周或選自宗英實於輔弼典掌衡軸彌綸政治蓋有奕葉載德濟美垂裕任職典化式是人望斯固礪礪寅亮之業茂焉非特藩翼懷寧之謂也至或登用非允授受斯失致覆敗者亦時有之斯可監也已

商微子啓帝乙元子為紂卿士

周公旦武王之弟自武王即位旦嘗輔翼武王用事居多武王九年東伐至孟津周公輔行十一年伐紂

至牧野周公佐武王作牧誓破殷入商宮封周公旦於少昊之墟曲阜是為魯公公不就封留佐武王及成王即位少在襁褓之中周公恐天下畔周乃踐祚代成王攝行政當國成王長能聽政於是周公乃還政於成王就群臣之位臣欽若等曰周公不就封以子伯禽之國其為王卿士者世為周公厲王奔彘時周公與召公立太子靜是為宣王二相輔之史闕其名其後莊王時有周公黑肩畢公高文王之子成王懼太子釗之不任乃命召公畢公率諸侯以相太子而立之

衛康叔封也封名也冉季載周公母弟皆有駟行於是周公舉康叔為周司寇冉季為周司空以佐成王治皆



有令名於天下

武公和康叔之後有文章又能聽其規諫以禮自防  
厲王時入相於周詩人作淇澳以美之

祭公謀父周公之後穆王時為王卿士

凡伯周公之裔厲王時為王卿士

虢文公文王母弟虢仲之後宣王時為王卿士

鄭桓公友周厲王少子而宣王庶弟也年表云  
幽王

以為司徒幽王八年  
為司徒和集周民周民皆說河雒之間

人便思之

武公掘突桓公子父子為周司徒善於其職國人宜

之故作緹衣之詩美其德以明有國善善之功焉

土子虎襄上時為太宰

漢澎侯澎東  
海縣屈菴中山靖王子武帝時自涿郡太守

為左丞相詔曰夫親親任賢周唐之道也以澎戶二

千二百封左丞相為澎侯

後漢東平王蒼光武子明帝時為驃騎將軍在朝數

載多所隆益而自以至親輔政聲望日重意不自安

上疏歸職帝優詔不聽疏云居宰相之位同氣  
之親餘具宗室退讓門

魏邵陵侯貞太祖族子文帝黃初三年以貞為上軍

大將軍都督中外諸軍事遷中軍大將軍七年與陳

羣等受遺輔政明帝卽位累遷大將軍司馬  
貞子武安侯爽明帝時爲衛武將軍帝寢疾乃引爽  
入卧内拜大將軍假節鉞都督中外諸軍事錄尚書  
事與太尉司馬懿並受遺詔輔少主

晉安平王孚宣帝次弟爲魏太傅武帝受禪詔曰太  
傅勲德弘茂朕所瞻仰以光導弘訓鎮靜宇内願奉  
以不臣之禮其封爲安平王邑四百戶進拜太宰持  
節都督中外諸軍事有司奏諸王未之國者所置官  
屬權未有備帝以孚明德屬尊當宣化樹教爲羣后  
作則遂備置官屬焉

孚子義陽王望爲魏司徒武帝泰始三年詔曰夫尚  
賢庸勲尊崇茂親所以體國經化式是百辟也且台  
司之重存乎天官故周建六職政典爲首司徒中領  
軍以明德近屬世濟其美祖考創業翼佐大命出典  
方任入贊朝政文德旣著武功宣暢逮朕嗣位彌道  
惟明宜登上司兼統軍戎内輔帝室外隆威重其進  
位太尉中領軍如故置太尉軍司一人叅軍事六人  
騎司馬五人又增置官騎并前三十假羽葆鼓吹  
汝南文成王亮宣帝子武帝末爲太尉錄尚書事遺  
詔委以後事楊駿索詔視事遂不還及駿誅詔曰太

司馬汝南王亮體道冲粹通識政理宣翼之績顯於本朝二南之風流於方夏將憑遠猷以康王化其以亮為太宰錄尚書事入朝不趨劔履上殿增掾屬十人給千兵百騎與太保衛瓘對掌朝政

亮子西陽王羨元帝太興初錄尚書事進位太宰領太尉

梁王彤宣帝子惠帝元康中為大將軍尚書令領軍將軍錄尚書事永康初共趙王倫廢賈后詔以彤為太宰守尚書令是時改司徒為丞相以彤為之倫滅詔彤以太宰領司徒

齊王攸文帝之子武帝踐祚時朝廷草創而攸總管軍事撫寧內外莫不景附遷驃騎將軍開府辟召禮同三司每朝政大義悉心陳之累遷侍中司空

攸子武閔王問惠帝時為平東將軍假節鎮許昌與成都河間嘗山新野四王誅趙王倫惠帝反正以問為大司馬於是輔政居攸故宮

成都王穎武帝子助齊王問誅趙王倫惠帝以穎為大將軍錄尚書事問敗穎懸執朝政事無巨細皆就鄰諮之

高密王泰宣帝弟暄之子惠帝永熙初為司空楚王

瑋之被收泰嚴兵將救之祭酒丁綏諫曰公爲宰相不可輕動且夜中倉卒宜遣人參審定問泰從之瑋既誅乃以泰錄尚書事遷太尉尚書令

東海孝獻王鈇惠帝西幸以鈇爲太傅與太宰頤夾輔朝政讓不受懷帝卽位委政於越武陵忠敬王遵元帝孫宋高祖義旗興復朝廷稱受密詔使遵摠攝萬機加侍中大將軍移入東宮內外畢敬遷轉百官稱制書又教稱令書安帝反正更拜太保

會稽文孝王道子孝武帝子大元中錄尚書六條事尋領司徒安帝踐祚有司奏道子宜進位太傅揚州

牧中書監假黃鉞備殊禮固辭不拜詔內外衆事動靜諮之帝既冠道子稽首歸政

宋彭城王義康高祖子文帝卽位初爲荊州刺史元嘉六年司徒王弘表義康宜還入輔政侍中都督揚南徐兗三州諸軍事司徒錄尚書事領平北將軍南徐州刺史持節如故二府並置佐領兵與王弘共輔朝廷弘既多疾且每事推謙自是內外衆務一斷之義康性好吏職銳意文按糾剔是非莫不精盡既專總朝權事決自己生殺大事以錄命斷之凡所陳奏入無不可方伯以下並委義康授用繇是朝野輻湊

勢傾天下義康亦自強不息無有懈倦府門每旦常數百乘車雖復位卑人微皆被引接愛惜官爵未嘗以階級私人凡朝士有才用者引入闕下樂為竭力不敢欺負

江夏王義恭高祖子文帝元嘉十六年進位司空加侍中都督揚南徐兗三州諸軍事司徒錄尚書事二十一年進大尉領司徒義恭既小心恭慎且戒義康之失雖為總錄奉行文書而已故文帝安之孝武卽降累加大宰前廢帝卽位詔曰總錄之典著自前代孝建始年雖楚并省而因革有宜理存濟務朕乳獨

在躬未涉政道百揆庶務允歸尊德太宰江夏王義

恭新除中書監太尉地居崇重受遺阿衡實深憑倚

冀康庶績可錄尚書事本官監太宰王如故

南郡王義宣高祖子孝武帝卽位初為中書監都督

揚豫二州丞相錄尚書六條事揚州刺史

建平王宏文帝子孝武入嗣以宏為僕射冠軍將軍

中書監宏謙儉周慎禮賢接士明曉政事世祖信伏

之

南齊竟陵王子良武帝子帝遺詔使良子輔政安成王知尚書事子良素仁厚不樂世務乃推安成詔云

事無大小悉與鸞參議

巴陵王寶義和帝西臺建以爲侍中司空梁王定京邑宣德太后令以寶義爲太尉領司徒詔云不言之化形於自遠時人皆云此實錄也

後魏江夏公呂道武族弟位外都大官委以朝政大見尊重扶風公處貞烈帝之後少以壯烈聞位殿中尚書委以大政甚見尊禮

文安公屈泥國之疎族明元時居門下出納詔命明元東巡命屈泥行右相命掌軍國甚有聲譽

彭城王勰獻文子孝文時除侍中長直禁內參決軍

國大政萬機之事無不預焉

咸陽王禧孝文末爲太尉與司徒彭城王勰司空北海王祥尚書左僕射廣陽王嘉等受遺輔政景明二年春詔曰朕以寡昧夙罹閔凶憂勞在疚罔知攸濟寔賴先帝聖德遺澤宰輔忠賢勛勞王室用能撫和上下肅清內外乃式遵復子歸政告遜辭理懇至邈然難奪便當勵茲空乏親覽機務咸陽王尊唯元叔道性淵凝可進位太保領太尉司空北海王季父英明聲畧茂舉可大將軍錄尚書事

高陽王雍宣武末爲太尉孝明卽位初侍中于忠以

門下議以帝幼年未親機政大尉高陽王雍屬尊望重宜入居西栢臺省決庶政

任城王澄明德茂親可為尚書令總攝百揆

清河王懌孝明卽位靈太后以懌帝之懿叔德允具瞻委以朝政事擬周霍懌竭力輔佐以天下為己任汝南王悅正光中為侍中太尉孝明詔入居門下與丞相高陽王雍參決尚書奏事

東魏孝靜天平二年二月以太尉咸陽王坦為太傅以司州牧西河王惛為太尉

三年二月以開府儀同三司華山王鷲為大司馬

四年正月以汝陽王暹為錄尚書事

興和四年四月以大尉彭城王勰為錄尚書事

武定二年三月以元弼為錄尚書事

北齊任城王湝高祖子自孝昭武成時車駕還鄴嘗令湝鎮晉陽總弁省歷司徒大尉弁省錄尚書事

彭城景思王浟高祖子皇建初拜大司馬兼尚書令轉太保武成入承大業遷太師錄尚書浟明練世務果於斷決事無大小咸悉以情

趙郡王叡河清中為司空攝錄尚書事累加尚書令拜太尉叡久典朝政譽望日隆

後周晉蕩公護太祖之兄邵惠公顥之少子自太祖為丞相立左右十二軍總屬相府太祖後皆受護處分凡所徵發非護書不行護屯兵禁衛盛於官闕事無巨細皆先斷後聞孝閔踐祚大司馬封晉國公邑萬戶遷大冢宰高祖立百官總已於護保定元年以護為都督中外諸軍事令五府總於天官

就國

自漢愍亡秦之失尊王子弟魏晉代興咸進戚屬申畫邦壤署置官號南面君民奕世傳祚所以屏翰王室為磐石之宗也而史氏或載其就封之始或述其

還國之自乃有勝衣疏爵既壯而方出明德入輔寵以言歸或脩覲而旋或被遣而去至於慈愛隆篤恩紀優洽亦并而叙之所以記封建沿襲之異宜典章因革之殊制者已

漢營隆侯澤立為琅邪王與齊人困生之國生勸澤急行毋留出關呂太后果使人追之已出即還

齊悼惠王肥高祖六年立孝惠二年入朝帝與齊王燕飲太后前置齊王上坐如家人禮

以兄弟齒列不從君臣之禮故  
日家太后怒欲鳩之齊王自以為不得脫長安內史士曰內史王官士者其名太后獨有帝與魯元公主今王有七



十餘城而公主乃食數城王誠以一郡上太后為公主湯沐邑太后必喜無患矣於是齊王獻城陽郡以尊公主為太王后為齊王太后言以母禮事之所以自媚也呂太后喜而許迺置酒齊邸樂飲遣王歸國

梁孝王武孝文十七年十八年比年入朝留比類也留謂留

在京其明年乃之國孝景二十九年入朝帝廢栗太子太后心欲以梁王為嗣大臣有所關說太后議格

乃辭歸國三十五年冬復入朝上疏欲留帝不許乃歸國

燕刺王旦武帝元狩六年四月與齊王閔廣陵厲王

王胥同日立且壯大就國

淮陽憲王欽宣帝元康三年立宣帝甚愛之元帝即

位乃遣之國東平思王宇宣帝甘露二年立元帝即

位就國

春陵仁侯以春陵下濕求減邑內徙元帝初元四年

徙封南陽之白水鄉猶以春陵為國名遂與從弟鉅

鹿都尉回及宗族往家焉

仁子敞襲封為廬江都尉族兄安眾侯劉崇起兵王

奔思惡劉氏徵敞至長安免歸國

後漢魯王興哀王石並建武二十七年就國東海恭

王疆建武二年立為皇太子十七年而母郭后廢疆不自安數陳懇誠願脩藩國十九年封為東海王二十八年就國帝以疆廢不以過去就有禮故優以大封兼食魯郡初魯恭王好宮室起靈光殿甚壯是時猶存故詔疆都魯中元元年入朝徙封岱因留京師明年冬明帝乃歸國

沛王輔楚王英濟南王康淮陽王延並建武二十八年就國

中山王焉以郭太后少子請王就國焉獨留京師三十年徙封中山王永平二年冬諸王來會瑩雍歸藩

詔焉與俱就國從以虎賁官騎焉上疏辭讓顯宗報曰凡諸侯出境必備左右故夾谷之會司馬以從今五國各官騎百人稱媿前行皆北軍胡騎便兵善射弓不空張發中必決皆夫有文事必有武備所以重藩職也王其無辭

東平王蒼明帝卽位為驃騎將軍表乞上將軍印綬退就藩國辭甚懇切永平五年乃許還國而不聽上將軍印綬六年帝幸魯徵蒼從還京師明年陰太后旣葬乃歸國十一年與諸侯朝京師月餘還國帝臨送歸宮悽然懷思乃遣使手詔國中傳曰辭別之後獨

坐不樂因就車歸伏軾而吟瞻望永懷實勞我心誦  
及采菽以增歎息蒼建初六年冬上疏求朝明年正  
月帝許之七年三月大鴻臚奏遣諸王歸國帝特留  
蒼賜以秘書列僊圖道術秘方至八月飲酎畢有司  
復奏遣蒼乃許之詔賜蒼曰骨肉天性誠不以遠近  
爲親疎然數見顏色情重昔時念王久勞思得還休  
署大鴻臚奏不忍下筆顧授小黄門中心戀戀惻然  
不能言於是車駕祖送流涕而訣復賜乘輿服御珍  
寶輿馬錢布以億萬計琅邪王京明帝尤愛幸永平  
五年乃就國

西平王羨章帝遣詔徙封陳王章和二年就國

陵安王恭章帝遣詔徙封彭城王章和二年就國

樂成王黨與章帝同年尤相親愛章和二年就國

下邳王衍有容貌章帝卽位嘗在左右章和二年就  
國

梁王暢明帝尤愛幸章帝緣先帝之意思恩寵甚篤和  
帝卽位就國

嘗山王章殤帝延平元年就國

清河王慶殤帝延平元年與濟北王壽河間王開嘗  
山王章就國慶立凡二十五年乃歸國

和帝遵肅宗  
故事兄弟皆

留京師有司請選諸王歸藩  
不忍許之殤帝立乃就國

千乘王伉伉子寵皆薨於京師子鴻嗣順帝卽位始就國

魏任城王彰大祖之子文帝卽王位彰與諸侯就國彰始以先王見任有功冀因此遂見授用而聞當隨例意甚不悅不待遣而去

陳思王植黃初元年與諸侯並就國四年來朝是時待遇諸侯法峻任城暴薨諸侯既懷友于之痛植及白馬王彪還國欲同路東歸以叙隔濶而監國使者不聽植發憤告離作詩以贈彪

晉東平王楙爲侍中與東安公繇善繇欲擅朝政與汝南王亮不平亮託以繇討楊駿顧望免繇楙等官遣楙就國又鎮平下邳惠帝西幸遣使者劉虔卽拜兖州刺史范陽王虓徙楙青州楙不受命虓遣將田徽擊破楙楙走就國

太原王輔武帝受禪初封渤海王泰始二年之國下邳王晃泰始二年與太原王瓌之國瓌子河間王顥初襲父爵咸寧二年就國

梁王彤武帝踐阼封梁王及之國遷北中郎將武帝咸寧

初遣諸王之國獨平原王幹有篤疾故特詔留之

樂安王鑿泰始中拜越騎較尉咸寧初以齊之梁鄒益封因之國服侍中之服

汝南王亮繇衛將軍侍中出爲鎮內大將軍都督豫州諸軍事開府假節之國

楚王瑋初封始平王大康末徙封於楚出之國都督荆州諸軍事

趙王倫武帝受禪封琅邪郡王及之國行東中郎將齊王攸爲鎮軍大將軍侍中太子太傅武帝諸子並弱太子不令內外屬意於攸中書監荀勗從容言于帝曰百僚內外皆歸心於齊王陛下試詔齊王之國

必舉朝以爲不可則臣言有徵侍中憑統又言曰陛下遣諸侯之國成五等之制者宜先從親始莫若齊王帝旣信勗言又納統說太平三年乃下詔曰古者九命作伯或入毗朝政或出禦方獄周之呂侯五侯九伯實得征之侍中司空齊王攸明德清暢忠允篤誠以母弟之親受台輔之任佐命立勳勗勞王室宜登顯位以稱具瞻其以爲大司馬都督清州諸軍事侍中如故假節將本營千人親騎帳下司馬大車皆舊增鼓吹一部官騎滿二十置騎司馬五人餘主者詳按舊制施行

秦獻王東為鎮西將軍西戎較尉假節與楚淮南王俱之國

淮南王允初封濮陽王拜越騎較尉太康十年徙封淮南仍之國

東海王越蕩陰之敗奔于下邳竟陵王楙不納越乃還國

後周宣帝大象元年五月以洛州襄國郡為趙國以齊州濟南郡為陳國以豐州武當安富二郡為越國以潞州上黨郡為代國以荊州新野郡為滕國邑各一萬戶令趙王招陳王純越王盛代王達滕王道並

之國

冊府元龜

淮南李嗣京叅閱

西極文翔鳳訂正

豫章黃國琦較釋

宗室部

人

委任

將兵

委任

春秋傳曰內姓選於親又曰親不在外蓋明德之選異姓為

後故有出領方伯式遏外侮入踐樞宰允釐庶政或  
總戎昭以扈蹕或司留務而居守內外之寄於茲為

冊府元龜 宗室部

卷之三百六十九

重自非蘊忠力以純茂聳才望而籍甚誠心篤固上所倚信風幹明允人用僉屬亦何以處股肱之任而裁決萬機守宗稷之重而厭伏眾志者哉

漢楚元王交高祖同父少弟高祖至霸上封交為文信君從入蜀漢還定三秦誅項籍郎帝位交與盧綰嘗侍上出入臥內傳言語諸內事隱謀

後漢東平王蒼為驃騎將軍明帝每巡狩蒼嘗留鎮侍衛皇太后

吳侍中峻堅弟靜之曾孫也大帝臨薨受遺輔政領武衛將軍故典宿衛封都鄉侯

晉秦王東武帝子帝用王佐之謀遣東都督關中楚王璋淮南王允並鎮守要害以疆帝室

河間王顥代梁王彤為西將軍鎮關中石函之制非親不得都督關中顥於諸王為疎特以賢舉

嗣譙王恬宗室勲望有才用孝武帝時深仗之以為都督兗青冀幽并揚州之晉陵徐州之南北郡軍事領鎮北將軍青兗等州刺史假節

宋臨州王義慶出為使持節都督荆雍益寧州居上流之重地廣兵強資實兵甲居朝廷之半故武帝使諸子居之義慶以宗室令美故特有此授



丹元  
委任

江夏王義恭孝武立加大尉錄尚書六條事及立太子東宮文案使先經義恭

當陽侯秉後廢帝時為散騎嘗侍丹陽尹與蕭道成袁粲褚淵分日入直決機事

南齊新吳侯景先高帝從子也為桂陽國右嘗侍高帝鎮淮陰景先以本官領軍主自隨防衛城內委以心腹

南豐伯赤斧高帝從祖弟也子穎胄為中書郎高帝以穎胄勲戚子弟除左軍將軍知殿內文武事得入便殿

豫章王嶷居高帝喪不參朝務而言事密謀多見信純服闋加侍中

晉安王子懋武帝永明十一年為征北將軍雍州刺史給鼓吹一部豫章王以喪服未畢帝以邊州須威望許得奏之

始平王遙光鬱林王隆昌元年除車騎將軍南東海太守行南徐州事仍除南彭城太守將軍如故又除輔國將軍吳興太守明帝廢鬱林以除寇軍將軍南蠻較尉西中郎長東南郡太守一歲之內頻五除並不拜是時帝欲即位誅賞諸事唯遙光共謀議明帝

子弟弱小晉安王寶義有廢疾故以暹光爲揚州居  
中暹欣居陝西在外權勢并在其門暹欣勇聚畜武  
士以爲形援

梁吳平侯景爲人雅有風力長於辭令其在朝廷爲  
衆所瞻仰於高祖屬雖爲從弟而禮寄甚隆軍國大  
事皆與議決

後魏遼西公意烈坐事賜死子枝博知古今父雖有  
罪道武以枝連宗親委之心腹有計畧屢効忠勤  
文安公泥子屈與南平公長孫嵩白馬侯崔密等并  
決獄訟

安定王彌明元泰嘗中南巡爲奚斤南討聲援詔彌  
與北新安同居守樂安王範之長子梁太武之兄子  
也太武未有子嘗曰兄弟之子猶子也親撫養之長  
而壯勇多知嘗參軍國大計  
東陽公丕爲太尉求致仕詔不許及文成南伐丕與  
廣陵王羽留守京師并加使持節詔丕羽曰留守非  
賢莫可太尉年尊德重位總阿衡羽朕之懿弟溫柔  
明斷故使二人留守京邑授茲二節賞罰在手其祇  
允成憲以稱朕心丕對曰謹以死奉詔羽對曰大尉  
宜專節度臣但可副貳而已帝曰老者之知少者之

决汝何得辭也孝文爲大傅錄尚書事時車駕北巡就家拜授丕留守詔曰中原始構須朕營視在代之事一委太傅

賊陽王鸞爲凉州刺史朝京師會文帝南討領鎮將軍定都雒陽孝文幸鄴詔鸞留守

趙邵王幹領吏部尚書太妃韓氏薨孝文詔曰季代多務情緣理奪幹旣居要任銓衡是荷豈容遂其私志致曠所司可遣黃門郎敦喻令勉從王事朕尋當與之相見拜使持節督南豫鄆東荆三州諸軍事征南大將軍開府豫州刺史及爲司州牧孝文南討詔

幹都督中外諸軍事給鼓吹一部甲士三百人出入殿門

廣陽王羽爲太子太保錄尚書事孝文將南討遣羽持節安撫六鎮發其突騎夷人寧悅還領廷尉卿車駕旣發羽與大尉丕留守加使持節及還都議定詔羽兼大尉告於宗室遷京之後北蕃人夷多有未悟羽鎮撫代京內外肅然帝嘉之

高陽王雍爲中護軍行鎮北大將軍孝文南伐以雍行鎮軍大將軍總攝留事

任城王澄爲吏部尚書時嘗州刺史穆泰在州謀反

推朔州刺史湯平王願爲王願表其狀孝文召澄入見凝間堂曰遠得平陽表曰穆泰謀爲不軌招誘宗室脫或必然遷京而爾北人戀舊南北紛擾朕雖陽不立也此事非任城不辦可爲我力疾向北如其弱也直往擒翦若其勢強可承制發弁肆兵以殄之此雖知王患旣是國家大事不容辭也澄曰泰等愚惑正戀木爲此非有遠圖臣誠怯弱不憚是輩雖復中毆豈敢有辭謹當罄盡心力繼之以死願陛下勿憂帝笑曰得任城此行朕復何憂也遂授節鉞虎竹使符御伏左右仍行嘗州事後遷右僕射南齊遣其大

尉陳顯達入寇漢陽是時孝文不豫引澄入見清徽堂詔曰顯達侵亂漢陽不安朕不親行莫攘此賊朕疾患淹年氣力憊敝如有非嘗委任城大事是役必須從朕澄涕泣對曰臣謹竭股肱之力畢命上報遂從駕南伐

澄子嵩孝明時爲平南將軍表請伐梁詔曰所陳嘉謀深是良計如當機形可進任將軍裁之旣而梁武尋克建業乃止

陽平王新成長子願累遷懷朔鎮大將軍都督三道諸軍事北討詔徵赴京問戰伐之事對曰當仰仗廟

筭使呼韓同渭橋之禮帝歎曰壯哉王言朕所望也  
北海王詳從孝文南伐爲散騎嘗侍帝自雒北巡詳  
嘗與侍中彭城王勰並在輿輦陪侍左右又以詳行  
中領軍留守給鼓吹一部甲仗三百人兼督營構之  
務及宣武覽政遷侍中大將軍錄尚書事帝講武於  
鄴詳於右僕射高肇領軍於涇留守京師帝禮敬尚  
隆憑寄無替軍國大事總而裁決每所敷奏事皆協  
允

彭城王勰爲司徒太子太傅侍中南齊將陳顯達內  
寇孝文親討之詔勰使持節都督中外諸軍事總攝  
六師帝不豫勰辭曰臣侍疾無暇六軍須有所託事  
不兩興情力又竭更請一王總當軍要帝曰戎務侍  
疾皆憑於汝牽病如此吾深慮不濟安六軍保社稷  
者舍汝而誰何容力更請人以違心寄宗社所賴唯  
在於汝諸葛孔明異姓受託而况汝乎行次清陽帝  
謂勰曰吾患轉惡汝其努力及至馬圈帝疾甚謂勰  
曰修短命也死生大分今吾氣力危憊當成不濟矣  
雖敗顯達國家安危在此一舉社稷所仗唯在汝身  
霍子孟以異姓受付况汝賢親可不勉也乃手詔宣  
武曰吾百年之後其聽勰辭蟬捨冕遂其冲挹之性

也及宣武卽位因以勰爲宰輔勰頻口陳遺旨謂遂  
素懷宣武對勰悲慟每不許之勰頻煩表聞辭義懇  
切帝難違遣勅遂其雅情猶逼以外任乃以勰爲使  
持節侍中都督冀定幽瀛營安平七州諸軍事驃騎  
大將軍開府定州刺史勰仍陳讓乃面申前意宣武  
固執不許乃許述職又齊將陳伯之屯肥口勰往訂之  
分命諸將頻戰伯之宵遁勰還京師帝臨東堂引見  
詔勰曰比鳳鳥未至蒼黎未化故仰屈尊謨綏懷邊  
附而寇豎昏迷敢闖淮楚叔父英畧高明應機殄定  
凱旋今辰伏慰悲停勰謝曰臣忝克戎帥撫安新故

而不能宣武導恩威懷遐邇致小豎伯之驅率蟻徒  
虔劉邊陲非唯仰慙天顏實亦俯愧朝列春秋責帥  
臣實當之賴陛下慈深捨過故使愚臣獲免罪責勰  
頻表辭大司馬領司徒及所增邑乞還中山有詔不  
許乃除錄尚書侍中司徒如故固辭不免勰雅好恬  
素不以勢利嬰心孝文重其事幹勢維不許雖有遺  
詔復爲宣武留連每乖情願嘗悽然歎息以詔旨慙  
勰僂俛應命後又錄尚書侍中司徒大師勰遂固辭  
詔曰蓋二儀分象君臣之位形焉上下旣位唱和之  
義生焉自古統天位之主曷嘗不賴明師仗賢輔而

後燮和陰陽彝倫民物者哉性而不返者先民誠有  
之斯所謂獨善其身而亂大倫山林之士耳賢人君  
子則不然也屈已以安民難身以濟物所謂以先知  
覺後知同塵而與天下俱潔者也朕猥以冲年纂臨  
寶曆實賴叔父拯濟之功誠宜永兼將相以綱維內  
外但逼奪先旨憚違冲挹俛志割心以遂高素自此  
水旱乖和陰陽失序是以屈王論道庶燮茲玉燭且  
師宰從容無廢清尚故周旦復辟而居之尚父期頤  
以終位王義兼國家理絕獨高可遣侍中敦喻宣武  
又修家人書於總曰諱言奉還告承猶執冲遜諱實

庸闇政術多秕輔弼之寄仰屬親尊叔父德望兼重  
師訓所歸豈得近遺家國遠崇清尚也便願紆降特  
副傾注之心總不得已而應命  
嘗山王素孫暉宣武時爲侍中領右衛將軍雖無補  
益深被親寵凡在禁中要密之事暉別奉旨裁之於  
體唯暉入乃開其餘侍中黃門莫有知者  
北齊趙郡王琛初任東魏爲定州刺史及斛斯椿等  
豐結高祖將謀內討以晉陽根本召琛留掌後事以  
爲弁肆汾大行臺僕射領六州九酋長大都督其相  
府政事琛悉決之

琛子獻小名頊拔從文宣還晉陽時濟南以太子監國因立大都督尚書府與尚書省分理衆事仍開府置佐顯祖特崇其選乃除獻侍中攝大都督後因侍宴文宣從容顧謂嘗山王演等曰近來亦有如此長史不吾用此長史何如嘗山王對曰陛下垂心庶政優賢禮物頊拔進居蟬珥之榮退當委要之職自昔以來實未聞如此銓授帝曰吾於此亦自謂得宜及世祖時爲司空攝尚書事突厥嘗侵軼至并州帝親御戎六軍進止皆令取獻節度

清河王岳初仕東魏爲晉州刺史西南道大都督得綏邊之稱時岳遇患高祖令還并治療疾瘳復令赴職及後爾朱兆猶據并州高祖將討之令岳留鎮京師遷驃騎大將軍儀同三司

岳子勸文宣之從弟也初除青州刺史拜日文宣戒之曰叔父前牧青州甚有遺惠故遣汝慰彼黎庶宜好用心無墜聲績勸流涕對曰臣以蒙幼濫叨拔擢雖竭庸愚懼忝先政帝曰汝旣能有此言吾不慮也後周廣川公測太祖長兄太祖爲魏丞相以測爲右長史委以軍國又測詳定宗室昭穆遠近於屬籍歷位侍中開府儀同



廣陵郡公孝伯字胡玉測弟深之子其生與武帝同日太祖甚愛之養於第內及長又與武帝同學武帝嘗謂曰公與我猶漢高與盧縮也賜以十三環金帶自是嘗侍左右出入卧內朝務皆得預焉孝伯亦竭心盡力無所迴避至於時政得失外聞細事皆以奏聞帝信委之當時莫比及將誅晉公護密與衛王直圖之唯孝伯及王軌宇文神舉等頗得參預大軍東討拜內史下大夫令掌留臺事軍還帝曰居守之重無忝戰功於是加授大將軍每車駕巡幸嘗執其手令居其中

齊殤王憲太祖第五子晉公護執政時雅相親愛及護誅高祖召憲入免寇拜謝帝謂之曰天下者太祖之天下也吾嗣守洪基嘗恐失墜冢宰無君凌上將圖不軌吾所以誅之以安社稷汝親則同氣休戚共之事不相涉何煩致謝乃詔憲往護弟收兵符及請簿籍等尋以憲為太冢宰

隋河間王弘高祖初為後周丞相嘗置左右委以心腹

觀德王雄高祖與廣平王參預朝政貴寵冠絕一時與高潁虞慶則蘇威柄為四貴

漢王諒為并州總管高祖幸溫湯而送之自山以東至滄海南抵黃河五十二州盡隸焉特許以便宜不拘律令

越王侗仁謹元德太子少子煬帝諸孫也帝每巡幸侗嘗留守東都

唐高祖義師初起授第四子巢王元吉大原郡守封姑藏郡公尋進封齊國公授十五郡諸軍事鎮北人將軍留鎮太原許以便宜行事

德宗貞元二年八月以睦王府長史嗣虢王則之為左金吾大將軍初帝以沈房超為金吾謂宰臣曰朕

不欲獨厚外戚亦選宗室子有才行者獎拔之乃特用則之焉

梁太祖幸西京制加建昌宮使金紫光祿大夫簡較司徒守開封尹博士友文為特進簡較太保使開封尹依前建昌宮使充東都留守

將兵

詩曰太宗維翰蓋言宗室之藩屏王國也目成周之並建子弟犬牙相錯維持夾輔載祀彌久秦漢而下或委以戎重或命之征伐或贊興王之業功參於締構或遏四夷之侮威宣於徼塞所以肅清邦慝震悼

王靈磐維之業亦云茂矣至有四郊多壘金革未息爰命親賢兼領督帥慎擇副貳大署僚佐資其風望以一摯志茲亦周室懷柔之道漢家尊王之旨也

趙

公子扶蘇始皇長子也始皇二十五年使扶蘇北監蒙恬軍於上郡

漢荆王賈高帝五年舉九江迎英布兵皆會陔下誅

項籍帝因使賈將九江兵與大尉盧縮西南擊臨江

王共尉共敖之子

燕土澤高祖十一年以將軍擊陳豨將黃封為營陵

侯

江都易王非初為汝南王吳楚反時非年十五有材氣上書自請擊吳景帝賜非將軍印擊吳吳已破徙

王江都治故吳國

治謂都之劉濞所居也

後漢順陽懷侯嘉光武族兄初隨更始征伐為偏將軍及攻破宛封興德侯遷大將軍擊延岑於冠軍降之更始既都長安以嘉為漢中王扶威大將軍擊持節就國都於南鄭衆數十萬  
下博侯張齊王石之子永平十六年與奉車都尉竇

固等並出擊匈奴

魏任城王彰大祖子漢末代郡烏桓反彰行驍騎將軍討之悉平

陳侯仁大祖從弟從大祖征伐有功累遷征南將軍文帝時屯宛權遣將陳邵援襄陽使將軍高遷等徙漢南附化民於漢北帝遣使卽拜仁大將軍又詔仁移屯臨潁遷大司馬復督諸軍據烏江遷屯合肥長平侯休大祖族子嘗從征伐文帝卽位夏侯惇薨以休爲鎮南將軍假節都督諸軍事車駕臨送帝乃下輿執手而別

邵陵侯貞大祖族子文帝黃初三年以貞爲上軍大將軍都督中外諸軍事假節鉞與夏侯尚等征孫權擊牛渚屯破之

吳奮威將軍瑜堅季弟靜之子以恭義軼尉始領兵衆是時賓客諸將多江西人瑜虛心綏撫得其歡心建安九年領丹陽大守爲衆所附至萬餘人加綏遠將軍十一年與周瑜共討麻保二屯破之後從大帝拒曹公於濡湏帝欲交戰瑜說帝持重帝不從軍果無功遷奮威將軍領郡如故自深陽徙屯牛渚瑜弟征虜將軍皎始爲護軍較尉領衆二千餘人是

時曹公數出濡頰皎奔赴拒號爲精銳遷都護征虜將軍代程普督夏口黃蓋及兄瑜卒又并其軍後呂蒙當襲南郡帝欲令皎與蒙爲左右部大都督蒙說帝曰若至尊以征虜能宜用之呂蒙能宜用蒙昔周瑜程普爲左右部督共攻江陵雖事決於瑜普自恃久將且俱是都督遂共不睦幾敗國事此目前之戒也帝寤謝蒙日以卿爲太督命皎爲後繼擒關羽定荊州皎有力焉

皎弟沙羨侯與皎旣卒與代統其衆以揚武中郎將領江夏太守黃武五年大帝攻石陽與以地主使所部將軍鮮於丹師五千人先斷淮道自帥吳願張梁五千人爲軍前鋒降高城得二將大軍引還拜楊威將軍封沙羨侯卒子承嗣以昭武中郎將大統兵領郡卒無子以庶弟壹奉負後襲業爲將孫峻之誅諸葛恪也壹與全熙施績攻恪弟公安督融融自殺壹從鎮南遷鎮軍假節督夏口

平南將軍輔堅兄之子也以揚武較尉佐策平三郡策討丹陽七縣使輔西屯歷陽以拒袁術并招誘餘民鳩合遺散又從策討陵陽王得祖郎等策西襲廬江大守劉輔隨從身先士卒有功後遷平南將軍

建德侯韶字公禮堅族孫也為將軍屯京城後封建  
德侯權稱尊號為鎮北將軍韶為邊將數十年善養  
士卒得其死力

丹徒侯桓年二十三拜安東中郎將與陸遜共拒劉  
備備軍衆甚盛彌山盈谷桓投刀奮命與遜戮力備  
遂敗走桓斬上甌道截其徑要備踰山越險僅乃得  
免忿恚嘆曰吾昔初至京城桓尚小兒而今迫孤乃  
至此也桓以功拜道武將軍封丹徒侯奉邑自置長  
吏

建昌侯慮字子智黃武七年封建昌侯後二年丞相

雍等奏慮性聰體達所尚日新北方近漢宜進爵稱  
王帝未許久之尚書僕射存上疏曰帝王之興莫不  
褒崇至親以光羣后故魯衛於周寵冠諸侯高帝五  
年封列於漢所以藩屏本朝為國鎮衛建昌侯慮稟  
性聰敏才兼文武於古典制宜正名號陛下謙光未  
肯如舊群寮大小咸用於邑方今姦宄恣睢金鼓未  
弭腹心瓜牙惟親與賢輒與丞相雍等議咸以慮宜  
為鎮軍大將軍授任偏方以光大業乃許之於是假  
節開府治并州

晉陽義成王望字子初泰始中吳將施績寇江夏邊

境騷動以望統中軍步騎二萬出屯龍陂爲二方重鎮節度加大都督諸軍事會荊州刺史胡烈距績破之望乃班師俄而吳將丁奉寇芍陂望又率諸軍以赴之未至而奉退拜大司馬孫皓率衆向壽春詔望統中軍二萬騎三千據淮北皓退軍罷

汝南王亮宣帝子爲侍中撫軍大將軍領後軍將軍統冠軍步兵射聲長水等營

亮子衛將軍祐初從惠帝還雒以征南兵八百人給之特置四部牙門永興初率衆依東海王越討劉劭有功拜揚武將軍

楚王瑋武帝第五子爲衛將軍領北軍中侯譙王恬回子尚之爲前將軍允之爲吳國內史恢之驍騎司馬丹陽尹休之襄城太守各擁兵馬勢傾朝廷南齊豫章王嶷太祖第二子宋末爲侍中總管內直衛沈攸之之難太祖入朝堂嶷出鎮東府加冠軍將軍袁粲舉兵之夕丹陽丞王遜告變先至東府嶷遣帳中軍王戴元孫二千人隨薛道淵等俱至石頭焚門之功元孫預焉

梁安成康王秀太祖子也高祖義師至新林諸王侯悉自收伏來赴高祖以秀爲輔國將軍是時東昏弟

晉熙王寶嵩爲冠軍將軍南徐州刺史鎮京口長史  
范岫行府州縣事遣使請兵高祖以秀爲冠軍長史  
南東海太守鎮京口城建康平仍爲使持節都督南  
徐兖州諸軍事南徐州刺史

臨川王宏高祖弟天監四年詔宏都督諸軍侵魏宏  
以帝之介弟所領皆器械精新軍容甚盛北人以爲  
百數十年所未之有軍次雒口前軍尅梁城

吳平侯景高祖從父弟爲南兖州刺史天監四年王  
師北伐景帥衆出淮陽進屠宿豫景丁母憂詔起攝  
職

南康簡王績高祖子普通四年自南兖州刺史徵爲  
侍中雲麾將軍領石頭戍軍事豫章王綜普通六年  
三月爲鎮北將軍南兖州刺史權頓彭城總督衆軍  
并攝徐州府事

鄱陽忠烈王恢齊明帝時爲前軍主簿在京師高祖  
義兵至恢於新林奉迎以爲輔國將軍三吳多亂高  
祖命出頓破崗建康平還爲冠軍將軍右衛將軍  
恢子範太清元年六月以前雍州刺史爲征北將軍  
總督漢北征討諸軍事

邵陵王綸高祖子太清二年八月爲安前將軍開府



儀同三司都督衆軍以討侯景

臨賀王正德太清二年八月爲北平將軍都督京師諸軍屯丹陽郡以備侯景

陳遂興縣侯詳字文幾少出家爲桑門善書記談論清雅高祖討侯景召詳令反初服配以兵馬從定京邑

南康郡王曇朗梁末爲著作佐郎高祖北濟江圍廣陵宿預人東方先據鄉建義乃遣曇朗與杜僧明自淮入泗應赴之齊援大至曇朗與僧明築壘抗禦尋奉命班師以宿預義軍三萬濟江高祖誅王僧辯留

曇朗鎮京口知留府事

宜黃縣侯惠紀字元方高祖從孫從平侯景杜龕除貞威將軍通直散騎嘗侍宣帝大建十年吳明徹北討敗績以紀爲持節智武將軍綠江都督兗州刺史臨海侯方慶南康愍王子也宣帝大建二年以廣州刺史馬靖久居嶺表夫得人心士馬強盛朝廷疑之至是以方慶爲仁威將軍廣州刺史以兵襲靖靖誅進號宣義將軍

後魏秦明王翰昭成帝子有高氣年十五便請征伐昭成壯之使領騎二千及長統兵號令嚴明多有尅

捷

任城王澄孝文時爲征北大將軍蠕蠕犯塞加澄使持節督北討諸軍事以討之蠕蠕遁走鎮州刺史穆泰在州謀反推朔州刺史陽平王頤爲主頤表其狀孝文召澄入見凝閒堂曰適得陽平表曰穆泰謀爲不軌招誘宗室脫或必然遷京甫爾北人戀舊南北紛擾朕雖陽不立也此事非任城不辨可爲我力疾向北如其弱也直往擒翦若其勢強可乘制發并肆兵以殄之雖知王患旣是國家大事不容辭也澄曰泰等愚惑正因戀本爲此非有遠圖臣誠怯弱不憚

是輩雖復患懼豈敢有辭謹當罄盡心力繼之以死願陛下勿憂孝文笑曰得任城此行朕復何憂也遂授節銅虎竹使符御仗左右仍行鎮州事及宣武時澄爲揚州刺史表請南伐詔發冀定瀛相并濟六州二萬人馬一千五百匹令仲秋之中畢會淮南并壽陽先兵三萬委澄經畧先是朝議有南伐之意以蕭寶夤爲東揚州刺史據東城陳伯之爲江州刺史戍陽石以澄總督二鎮授之節度至是勤兵進討以東關水峴嶮要若東關縱水陽石則合肥有急懸之切不圖大岷則歷陽有乘險之援淮陵陸道九山水路

並宜經畧

北海王顥爲車騎大將軍儀同三司時葛榮南進稍逼鄴城太武初以顥爲侍中驃騎大將軍開府儀同三司相州刺史以禦榮

江陽王繼爲平北將軍鎮攝舊都高車酋帥樹者權部民反叛詔繼都督北討諸軍事自淮朔巴東悉稟繼節度

趙郡王幹爲豫州刺史孝文南伐以幹爲使持節車騎大將軍都督關右諸軍事給銅虎符十

高陽王端爲安東將軍青州刺史是時梁將寇逼徐

揚除端撫軍將軍金紫光祿大夫使持節東南道大使處分軍機

彭城王勰孝文時爲侍中帝南伐以勰行撫軍將軍領宗子軍宿衛左右

梁郡公元嘉泰和三年十一月進爵爲假王督二將出淮陰隴西公元琛督三將出廣陵

中山王英正始三年四月爲征南將軍都督揚徐二道諸軍事指授邊將時郢州治中都督榮祖潛引梁軍以義陽應之三關之戍並據城降梁郢州刺史婁悅嬰城自守懸斃城民白早生等殺豫州刺史司馬

悅據城南叛梁將齊苟仁率衆守懸瓠悅子尚華陽  
公主王弁爲所劫詔英使持節都督南征諸軍事假  
征南將軍出自汝南宣武引英謂之日婁悅統御失  
和銓衡闇於簡授故使郢民引寇關戍外奔義陽孤  
窘有倒懸之切王國之召虎威名宿震故屈王親總  
元戎掃清氛穢昔衛霍以匈奴之故居無寧歲今南  
疆不靖王不得以屢勞爲辭也英對曰臣才非韓白  
識闇孫吳徒以宗室之長頻荷推轂之寄規畧淺短  
失律喪師宜彰子反之戮以謝天下陛下慈深念屢  
愛等鍾午使臣得同荀伯再生明世誓追孟氏復爲

後期關郢微寇何足平殄滅賊方畧已在臣目中願  
陛下勿勞聖慮也宣武曰截彼東南再清隨楚而望  
於將軍鍾離一青豈足以損大德今王董彼三軍朕  
無憂矣

北齊蘭陵武王長恭文襄子初爲大尉與段韶討栢  
谷又攻定陽韶病長恭總其衆前後以戰功別封鉅  
鹿長樂平高陽等郡公

後周陽蕩公護高祖時爲大冢宰東征於齊詔曰神  
若軒皇尚云三戰聖如姬武且曰一戎弧矢之威干  
戈之用帝王大器誰能去兵太祖丕承天命造我周

室日月所照罔不率從高氏乘釁跋扈竊有并冀世濟其惡腥穢彰聞皇天震怒假手突厥驅畧汾晉掃地無遺季孟勢窮伯圭日蹙坐待滅亡鑒之愚智故突厥班師仍屯彼境更集諸部傾國重來星流電擊數道俱進期在仲冬同會并鄴大冢宰晉公朕之懿昆任隆伊呂平一宇宙惟公是屬朕當親執斧鉞廟庭祇授有司宜勤衆軍量程赴集進止遲速委公處分於是徵二十四軍及左右廂散隸及秦隴巴蜀之兵諸蕃國兵二十萬人帝於廟庭授護斧鉞出軍於東平郡公神舉宣政元年爲司武上大夫高祖北伐

令神舉與原國公姚願等率兵俱入至雲陽班師及幽州人盧昌期等據范陽反詔神舉討擒之

隋衛昭王爽初高祖以爲行軍元帥步騎七萬以備胡出平涼無虜而還

高都縣侯尚希初仕後周爲司憲中大夫高祖總百揆尉迺屯兵武涉遣尚希督宗室兵三千人鎮潼關唐永安王孝基高祖從父弟武德二年劉武周將宋金剛來寇汾澮夏縣人呂崇茂殺縣令舉兵自稱衛王請援於武周以孝基爲行軍總管討之

淮安王神通高祖從父弟隋末義師起與司竹賊何

潘仁合勢下鄆縣衆踰一萬自稱關中道行軍總管  
從高祖平京師武德元年爲山東道安撫大使擊宇  
文化及於衛縣竇建德旣虜化及神通後爲建德所  
陷及建德敗復授河北道行臺尚書左僕射從大宗  
平劉黑闥

神通子膠東郡公道彥貞觀中爲岷州都督李靖之  
擊吐谷渾也詔道彥爲赤水道行軍總管以討之  
道彥季弟梁郡公孝逸光宅元年徐敬業據揚州作  
亂以孝逸爲左玉鈐衛大將軍揚州軍大總管督  
軍以討之

河間王孝恭高祖從父兄子武德三年爲夏州總管  
令大造舟楫教習水戰以圖蕭銑尋授荆湘道行軍  
總管統水陸十二總管六年輔公祐據江東發兵寇  
壽陽命孝恭爲行軍元帥以擊之

淮陽王道玄高祖從父兄子武德初從太宗擊宋金  
剛王世克竇建德以功拜雒州總管五年劉黑闥引  
突厥寇河北以道玄爲山東道行軍總管以討之  
江夏王道宗道玄從父弟武德初從太宗討劉武周  
王世克有功貞觀三年爲大同道行軍總管與李靖  
破頡利可汗及吐谷渾寇邊以李靖爲崑丘道行軍

大總管道宗副之

隱太子建成高祖子隋末義師起拜左領大都督引

兵畧西河郡從平長安授軍大將軍東討元帥將兵

十萬徇雒陽

臣欽若等曰武德元年以後事俱儲宮將兵門

巢王元吉高祖子武德四年為稷州刺史襄州道行

臺尚書令太宗征竇建德留元吉圍王世充於東都

榮王琬玄宗子天寶十四載十一月安祿山叛册琬

為元帥以河西節度高仙芝為副元帥統諸軍以東

征內出錢帛於京師召募十萬眾號曰天武健兒旬

日而集屯軍灞上旌旗營帳達亘二十里照耀於原

野

嗣號王巨天寶中坐與史敬忠相識於襄陵郡安置

蜀安祿山反陷東都玄宗擇將帥十五載二月張垆

自襄陽追見禁中因奏巨宗室中善騎射有謀畧玄

宗追至京遂以為譙郡太守攝御史大夫河南節度

使明日巨稱官御奏謝玄宗驚曰何得令攝即日詔

兼御史大夫巨奏曰方今艱難忽為賊所詐召臣不

知何以取信玄宗劈木契分授之遂以巨兼領嶺南

南陽三節度使

越王係肅宗子代宗乾元二年詔充天下兵馬元帥

應緣軍署置所司准式

舒王謨代宗子德宗建中四年九月爲揚州大都督持節荆襄江西沔鄂等道節度兼諸軍行營兵馬都元帥賜名誼改封晉王時李希烈悉衆攻襄城德宗將遣江西鄂岳之帥進攻蔡州慮無統帥不能齊一乃命焉以兵部侍郎蕭復爲戶部尚書兼御史大夫元帥統軍長史舊令有行軍長史以復父名衡特更之又以新除潭州刺史孔巢父爲右庶子兼御史大夫充行軍左司馬以山南東道節度行軍司馬簡較兵部郎中兼御史大夫樊澤爲諫議大夫兼御史中

丞行軍右司馬刑部員外郎劉從一爲吏部郎中兼御史中丞侍御史韋纘爲工部郎中兼御史中丞並爲判官兵部員外郎高參爲兵部郎中掌書記左金衛大將軍渾瑊爲簡較工部尚書兼御史大夫爲中軍虞侯江西節度使嗣曹王臯爲前軍兵馬使鄂岳都團練使李兼爲之副山南東道節度使賈耽爲中軍兵軍使荆南節度使張伯儀充後軍兵馬使以右神武軍將軍王价爲簡較太子賓客右衛將軍高承謙爲簡較太子詹事司農少卿郭曙爲簡較太子左庶子前秘書省著作郎嘗愿爲簡較秘書少監并充



押衙

輝王祚天復三年二月制為天下兵馬大元帥

嗣軍王臣欽若等曰史闕名景福二年制以為京西招討使神

武大將軍李鐵副之

通王史失其名乾寧三年二月制以為開府儀同三司判

侍衛諸軍事

梁郢王友珪開平四年十月簡較司徒充左右控鶴

都指揮使兼管四蕃將軍乾化元年充詣軍都虞侯

冀王友謙開平五年四月詔曰邠岐未滅關隴多虞

宜擇親賢總茲戎重應關西同雍化鄭延夏等六道

兵馬并委冀王收管指揮凡有抽差先申西百部招

討使仍別奏聞庶合機權以寧邊鄙

邵王友誨乾化元年以簡較兵部尚書充控鶴二指

揮使

友寧字安仁太祖從子少習詩禮長喜兵法有側儻

之風太祖鎮汴累署軍職每因出師多命驍果以從

友倫太祖仲兄存次子也帝愛其才氣錄為皇子署

軍職領騎卒

後唐魏王繼岌莊宗子同光二年三月詔充諸道行

營都統鄴都留守興聖宮使判六軍諸衛事伐蜀置

中軍以梁漢顒充軍馬步都虞侯兼中軍馬步都指揮事張廷蘊充中軍步軍都指揮使牛景章充中軍左廂馬軍都指揮使沈斌充中軍右廂馬軍都指揮使卓瓌充中軍左廂步軍都指揮使王贊充中軍右廂步軍都指揮使供奉官李從襲充四面行營中軍馬步軍都監押高品李延安呂知柔充衛王衙通謁工部尚書任圜翰林學士李愚從魏王出征參預軍機

秦王從榮明宗子長與中以本官充天下兵馬大元

帥

卷終

